

PPA a presenta su plan di partido:

“A base di e realidad di e comunidad aki ta fiha un vision pa e proximo 25 año”

Durante conferencia di prensa ayera mainta lider di partido politico PPA, Otmar Oduber, a anuncia e plan di partido cual tin como number “Nos Aruba 2025-2050” y alabes a elabora riba tres punto cardinal cu e plan di partido ta enfoca riba dje.

Oduber a splica cu e plan di partido aki su partido kier muestra riba e hecho cu no por goberna un pais a base di un plan di cuater año, pero mirando e desaroyo cu tin na Aruba cu a yega e momento pa implementa un vision en bes di un plan pa un periodo mas largo. Pa e motibo ey PPA a scoge pa un vision di 25 año pa asina e gobernacion cu ta bay tin durante e prome cuater añanan ta parti di e meta cu nan kier logra despues di 25 año.

El a remarca cu e proceso pa yega na un vision di partido tabata “un proceso bunita” durante cual nan a combersa cu hopi instancia den comunidad. “Pa PPA tabata importante pa prepara un documento cu a base di no solamente di kico den campaña bo ta sinti ta necesario pa comunidad, pero cu a base di e realidad di e comunidad aki ta fiha un vision pa e proximo 25 año,” el a indica.

E ex minister a señala cu hopi gobernacion den pasado a pone plannan pa cuater año, pero no ta logra nan y otro gobierno ta bin of mesun gobierno ta bin cu coalicion diferente, y plannan tras di plannan ta ser traha pero e realidad mes semper ta keda pasobra nunca tabatin un plan a largo plaso. “Na final di dia bo ta purba crea un maneho general cu ta trece bienestar general pa comunidad,” el a subraya.

Pa loke ta e programa di vision di e partido Oduber a splica cu e curason di e programa di vision ta draai rond di tres punto specifico. Un di nan ta e tema di pensionadonan. El a splica cu ya caba for di año pasa a traves di plataforma Pais, cual ta e plataforma cu Oduber a lanta pero no a logra registra na tempo pa participa den e eleccion parlamentario binidero, a trece dilanti e situacion di pensionadonan.



El a sigui splica cu su partido a reuni cu e Organizacion pa Pensionado Publico di Aruba (OPPA) na por lo menos tres ocasion oficial, y nan a reuni tambe cu SVB, AZV y diferente instancia den comunidad, gremio comercial y dunadonan di trabou ariba e plannan cu PPA tin pa solucionar e dolornan di e pensionadonan na Aruba.

Un di puntonan cardinal den e tema di pensionado, Oduber a enfatisa, ta cu PPA ta contra e aumento di edad di pensioen manera cu e ta proponi aworaki den Ladspakket pa subie na 66 año pa despues consecutivamente sigui aumenta esaki mas.

“Partido PPA no lo permiti esaki, nos no ta kere den dje tampoco, nos ta kere cu nos mester haci nos huiswerk, nos mester percura reduci e gastonan di gobierno, duna e fondonan necesario adicional na AZV na SVB pa por cubri e diferencianan cu tin pa di e forma ey no tin cu recurri na e medida di atrobe bay aumenta edad di pensioen na Aruba,” el a resalta.

El a sigui menciona cu lo percura pa adapta e ley na pa crea e oportunidad pa e pensionadonan dicidi si nan kier sigui traha un poco mas despues di 65 año, cual naturalmente ta significa cu “parkeer” e pensioen y nan ta cobra mas pensioen mas laat of ta baha cu pensioen mas prome y ta cobra un poco menos pensioen e añanan ey.

Di dos punto di enfoka di e

plan di vision di partido PPA ta costo di bida. Oduber a remarca cu ta imposibel pa cera wowo pa e realidad cu comunidad ta bibando aworaki. Relaciona na e ultimo noticia tocante aumento di tarifa bancario pa transaccionnan local, el a splica cu e programa di PPA ta atende cu e aspecto aki caminda ta habri e posibilidad pa pone un fin na e monopolio di banconan na Aruba, habri porta y pone instrumentonan necesario hunto cu Banco Central pa crea competencia den banconan. “E meta ta pa e ciudadano habri un cuenta na banco unda e ta haya e miho servicio y tarifanan y no manera cu e ta aworaki cu na cierto momento ta sinti cu loke ta rigi ta cu banconan ta cera cabes hunto y palabra riba gastonan haltisimo,” el a señala.

Oduber a trece dilanti tambe cu den e mesun liña aki den e programa di vision ta papia di introduccion di un ley cu ta bisa cu tur comerciante, tur persona cu ta haci comercio na Aruba, pa ley tin e derecho di tin un cuenta di banco y mescos ta conta pa tur ciudadano.

Di dos aspecto di costo di bida, Oduber a remarca ta cu PPA ta para pa un reforma. El a splica cu e reforma aki ta consisti di elimina BBO, ta bin cu un BTW na frontera cu ta bay pone cu e sistema di cobra di gobierno ta mas husto y igual y tur hende lo paga belasting e ora.

El a agrega cu paden tambe

mester percura pa reduci loonbelasting, elimina inkomenbelasting y percura pa winstbelasting tambe ser reduci pa e pueblo tin mas placa den su cartera.

“Esaki combina cu e reduccion di gastonan di gobierno cu 12%, un averahe 140 milyon florin den goederen en diensten cu mester percura cu durante e prome cuater año di gobernacion den e plan di 25 año aki ta ser reduci y e placa ey ta bay ser inverti den entre otro e pensionadonan,” el a indica.

E di tres punto di enfoka den e programa di vision di su partido tin salubridad. Oduber a remarca cu den cuadro di reduci gastonan di gobierno mester hinca fondonan adicional den loke ta sector di cuidu cu ta contribucion di gobierno y no mediante eigenbijdrage manera ta proponi den e Landspakket.

El a subraya cu PPA ta contra y no lo acepta esaki den un proximo gobierno. El a resalta cu Aruba mester demostra Hulanda cu e mes por baha su gastonan den e aparato gubernamental y no pone un otro peso riba e comunidad, manera cobra eigenbijdrage, cual el a enfatisa ta inaceptabel.

Por ultimo el a indica cu den e programa di vision ta propone tambe pa salubridad publico bira competitivo. El a splica cu ta propone pa habri mercado di e region pa por duna servicio na Aruba paso-

bra no por sigui cu tur año ta manda 37 pa 38 milyon dollar den exterior ki ora cu un persona bira malo.

Reportera di Bon Dia Aruba a puntra Oduber si e ta kere e caso cu tin contra dje por tin un efecto pa loke ta trata eleccion. El a indica cu desde inicio di investigacion semper el a keda na disposicion di autoridatnan hudicial cu e unico meta di prueba su inocencia.

“No tin ningun hende mas interesa cu mi mes pa aclaria e hechonan y asina finalisa 5 año di acusacionnan falso, tardansanan y iregularidadnan den mi caso. Mientrastanto mi ta concentra den splica nos conciudadanonan mi vision Aruba 2050 y con awe mi ta den pleno capacidad, manera ma haci e anteriormente, pa cuminsa hunto cu PPA iniciativa- y proyectonan cu ta permiti nos construi e pais cu nos merece. Loke ta importante ta e solucionnan pa desaroyo di Aruba,” el a enfatisa.

A puntra e politico tambe si el a tuma of ta tumando pasonan pa supera e imagen di corrupcion cu talbes ta rondona su persona pa motibo di e mesun caso ey. Oduber a splica den su contesta cu pa a loke ta e tema di corrupcion e kier ta bon cla: “e miho respuesta na e atake- y acusacionnan falso ta e trabou y resultadonan cosecha. Durante henter e tempo aki mi a concentra riba loke realmente ta importante: solucionnan pa nos Arubianonan.” El a agrega cu loke mas ta hayando su atencion awo ta futuro di Aruba. El a remarca cu e ta enfocando totalmente riba construccion di Plan Nos Aruba 2025-2050, pa bin cu solucionnan cu lo laga Aruba bira un pais sostenibel, cu un economia moderno y consenshi social.

“No ta pasado loke mester defini futuro, pero nos accionnan concreto pa progreso di Aruba. Mi a demostra cu hechonan cu mi prioridad ta e pais aki y cu mi tin e capacidad pa lidera cu responsabilidad y compromiso. Mi unico obhetivo ta traha pa Aruba bira un pais mas prospero. Den corte lo keda conclui cu cada acusacion tabata sin base y mi inocencia lo keda demostra,” el a enfatisa.